

清·方略館 編

清代 方略 全書

北京圖書館出版社



清代方略全書

一七〇

清·方略館
編

北京圖書館出版社

清·奕訢等撰

欽定剿平捻匪方略

卷三十一——三二〇

清同治十一年（一八七二）鉛印本

欽定剿平捻匪方略卷三百十一

戊辰年



閏四月初二日己酉左宗棠奏言臣於四月二十

三日行抵鹽山城西十八里地方探悉賊由西
南竄走乃改道向南旋接劉松山等報稱二十
二日賊東竄至舊滄州方圖搶渡減河忽見大
軍馳至喉黨西來迎拒宋慶率所部衝擊劉松
山張曜向東截之槍礮轟擊斃賊甚衆鏖戰半

時賊始敗竄折向東南以趨鹽山各軍追二十餘里收隊共計生擒悍賊一百餘名訊知賊之北竄意在天津覓購子藥且掣引追軍與之俱北仍遂其竄撲運西之計劉松山等仍向東南追擊臣於二十四日馳抵甯津復接劉松山等馳報賊由鹽山掠樂陵而過邊馬已及德平賊蹤多向南竄臣以該逆意在西撲運河則吳橋

較甯津爲要二十五日臣仍馳回吳橋連日偵
探賊由臨邑平原向西南竄走二十七日已過
高唐總兵郭運昌一軍已由恩縣躡追而南劉
松山馬步各軍亦當距賊不遠矣賊旣竄過高
唐必由清平博平茌平以撲運河臣得郭松林
二十一日東昌函稱已築牆六十里丁寶楨十
九日函稱牆工限十日竣事以時日計之則賊

至牆成西岸防兵有所憑藉東岸追兵又可速
至機局實爲湊拍賊如徑竄張秋不能越過則
地勢愈偏滅之必矣臣仍暫駐吳橋北顧直隸
運河南防狂寇回竄儻賊或竄過西岸尙可由
德州橋口渡師西出截其北竄

同日英翰奏言臣於四月十九日由東昌赴沙
店督戰適臬司史念祖報稱我軍至城東四十

里賊知官兵均集東昌卽折回禹城臨邑一帶
奔竄郭運昌等馳逐七十餘里未經追及恐賊
乘閒偷渡運西該臬司由博平高唐一帶沿運
河東岸探蹤追剿臣知臨清一路僅方長華一
軍兵力尙單卽督帶黃秉鈞等軍於二十一日
馳抵臨清一面親督各軍緊傍運西排營設守
一面催牛師韓郭運昌緊躡賊蹤併力窮追該

逆於二十日竄過德平二十一日竄滄州南境
經左宗棠派劉松山程文炳等攔頭扼擊折回
南竄二十五日擾及平原禹城及齊河境內郭
運昌等亦回軍向恩縣一路進剿二十六日行
至距城南二十里遇賊邊馬知賊大股不遠議
定郭運昌從左路進牛師韓從右路進馬隊則
分中左右三路併進各莊踞賊不虞我軍驟至

紛紛驚遁我軍排壓而前連奪十餘村殺賊六七百名追至八里以外該逆列隊回拒牛師韓親督馬軍遏其邊股郭運昌率步隊直擣中堅矛刺槍傷又陣斃悍賊三四十人賊乃向西南敗走臣查賊蹤剽疾必宜戰守兼籌乃可制其死命現在牛師韓郭運昌兩軍均緊躡追擊劉松山等軍日內諒亦趕到游擊之師已敷轉戰

所重者祇在運西防務臣連日布置略有頭緒
惟水淺土鬆地長工鉅且程文炳一軍屢催未
到僅黃秉鈞等六千人恐十日之內尙未可恃
臨清迤南者如是丁寶楨所防東昌迤北者亦
然至臨清迤北雖水勢甚大民團亦屬齊心惟
地段究屬遼闊臣昨函致李鴻章官文請其酌
撥隊伍大約已有布置二十七日漕臣張之萬

所派張從龍統帶三千人趕到適據探報賊至
清平縣境距河僅四十餘里臣擬卽馳赴觀音
嘴沿河一帶親自布置卽以張從龍一軍暫同
協守並隨時與左宗棠李鴻章丁寶楨妥商調
派以期仰紓

宸廑均奏入
上命軍機大臣傳諭左宗棠李鴻章官文英翰丁寶

楨曰捻逆擾至舊滄州經宋慶等追擊折向東南
由鹽山掠及樂陵德平一帶郭運昌等軍敗賊於
恩縣城南賊復走清平縣境是賊之縱橫奔突總
思搶渡運河現在東昌沿運一帶牆工計已竣事
追勦各軍不下十萬機勢實有可乘左宗棠務將
運西力加扼守並商同英翰丁寶楨嚴飭劉松山
等軍相機夾擊其臨清迤北等處並著李鴻章官

文緊趕派撥隊伍前往填紮丁寶楨亦當督同郭松林等嚴扼張秋一路與英翰所統各軍絡聯聲勢毋任匪蹤竄越如稍有疏虞必惟丁寶楨是問至前敵調派事宜乃李鴻章專責該大臣務須嚴督淮湘各軍奮加勦擊依限滅賊迅奏膚公儻日久防疏致賊勢復形蔓延則咎各有歸朝廷不能爲之曲貸也英翰現赴觀音嘴一帶著卽將防務

妥爲布置並籌進剿其張從龍一軍卽歸該署撫
調度以厚兵力

同日鄭敦謹奏言前奉

諭旨陳國瑞一軍飭令前往吉州一帶渡河而西將

宜川等處回匪相機截剿以固晉疆一切進止機

宜著暫歸鄭敦謹妥爲調度當經知照該侍衛定

期拔隊西行旋於四月二十二日接該侍衛咨

稱疊據探報捻逆竄至天津之靜海滄州一帶
京畿防務十分喫緊擬率所部馬步勇丁剋日
拔隊北援誓平兇逆可否代爲附奏等情臣查
陝回竄擾宜川已向西趨距晉邊稍遠河西防
務尙非十分喫緊而捻逆竄擾津沽切近畿輔
該侍衛擁有勁旅力思北援自爲先其所急起
見未便阻其投效之忱理合據情代爲馳奏再

查該侍衛帶隊北援前赴天津距臣防所較遠
其進止機宜似難遙制應就近歸何路統兵大
臣節制之處恭候

聖裁奏入

上命軍機大臣傳諭鄭敦謹曰現在捻逆退竄東境
各路大軍雲集疊諭該統兵大臣等速籌攻剿自
當剋日殲除回逆雖向西趨距晉稍遠而河西一